

Na osnovu člana 40. Statuta Sindikata doktora medicine i stomatologije Kantona Sarajevo Upravni odbor Sindikata na IX redovnoj sjednici održanoj 19.12.2023. godine donosi

P R A V I L N I K

o načinu i postupku ostvarivanja prava na naknadu u slučaju teške povrede/bolesti i/ili invalidnosti kao i odlaska u penziju člana Sindikata doktora medicine i stomatologije Kantona Sarajevo

Član 1.

Član Sindikata doktora medicine i stomatologije Kantona Sarajevo (u nastavku: Sindikat) ima pravo na naknadu u slučaju teške povrede/bolesti i invalidnosti kao i u slučaju odlaska u penziju.

Član 2.

- 1) Pod teškim bolestima i teškim tjelesnim povredama u smislu člana 1. podrazumijevaju se bolesti koje zahtijevaju kontinuirano medicinsko praćenje, višekratno bolničko liječenje u jednoj godini, skupu dijagnostiku, upotrebu medicinskih pomagala, medikamentozni tretman skupim lijekovima, a koja nisu na listi esencijalnih lijekova. Kao i bolesti i povrede koje i pored intenzivnog liječenja dovode do trajnog oštećenja organizma, dugotrajno bolovanje i smanjenje ili gubitak radne sposobnosti oboljelog.
- 2) Pod teškim bolestima se podrazumijevaju i teška stanja bolesti :
 - kada su funkcije organizma patološki otklonjene,
 - kada su simptomi izraženi u teškom obliku,
 - kada su bolesnikove aktivnosti bitno smanjene,
 - kada je ozbiljno ugroženo zdravlje i život oboljelog.
- 3) Pod teškom tjelesnom povredom podrazumijeva se povreda koja:
 - ozbiljno oštećuje zdravlje,
 - ugrožava život,
 - ima trajna ili privremena oštećenja ili uništenja važnog organa ili dijela tijela.
- 4) Pod invalidnošću se smatra invalidnost od najmanje 60% oštećenja organizma. Stepen invalidnosti određuje POV-prvostepeni organ vještačenja KS.

Član 3.

Zahtjevi za određivanje kvalifikacije bolesti odnosno povrede oboljelog temeljom kojih se ostvaruju pravo za novčanu naknadu za slučaj teške povrede/ bolesti i invalidnosti moraju se predati u roku od 180 dana od momenta nastanka bolesti, povrede ili invalidnosti.

Član 4.

Zahtjevi se ne mogu predati dva puta za istu dijagnozu.

Član 5.

Teška bolest/povreda ili invalidnost se dokazuje na osnovu dijagnoza iz otpusnog pisma ili druge priložene medicinske dokumentacije iz koje se bez sumnje može utvrditi moment nastanka bolesti, kao i medicinskom dokumentacijom i rješenjima Komisije za ocjenu privremene spriječenosti za rad (PLJK), rješenjem Komisije prvostepenog organa vještačenja (POV-) ili rješenjem Komisije za odobravanje liječenja u inostranstvu.

Nastanak bolesti odnosno povrede i invalidnosti smatra se moment uspostavljanja dijagnoze temeljom koje se traži ostvarivanje prava na novčanu naknadu, odnosno datum pravosnažnosti rješenja kojim je utvrđena invalidnost (POV- prvostepeni organ vještačenja).

Dužina privremene spriječenosti za rad se dokazuje rješenjima Prvostepene ljekarske komisije (PLJK).

Član 6.

- 1) Novčana naknada za tešku bolest, povredu i invalidnost je 1.000,00 KM.
- 2) U slučajevima kada je potrebno liječenje skupim lijekovima koji nisu na Listi esencijalnih lijekova, skupa dijagnostika koja se ne može uraditi u BiH, potreba za više medicinskih pomagala koje ne odobrava ZZO novčana naknada će iznositi 1.500,00 KM.

Član 7.

Lista bolesti:

- Maligne bolesti sa lokalnim i/ili sistemskim širenjem,
- Teške infektivne bolesti praćene komplikacijama koje ugrožavaju život i zahtijevaju bolničko liječenje (HIV, Hepatitis B, Hepatitis C, Covid i sl.),
- Teške bolesti uro-genitalnog trakta, bubrežna oboljenja koja i pored terapije i metoda liječenja ne dovode do poboljšanja već dolazi do trajne posljedice funkcionalnog oštećenja bubrega tj. hemodijalizu ili transplantaciju,
- Teška endokrine bolesti sa komplikacijama (sljepoća, gangrene) koje ozbiljno ugrožavaju život i dovode do ozbiljnog funkcionalnog oštećenja ili onesposobljenja oboljelog,
- Teške neurološke bolesti (teški oblik MS EDDS scor 5-10, teški oblik Parkinsonove bolesti Hoehni i Yahr stadij 3-5, teški oblik Myastenia gravis) paralize, pareze, disfazija, afazije, koje onemogućavaju ili ograničava radnu sposobnost,
- Traume ili bolesti lokomotornog sistema koje ograničavaju ili onemogućavaju radnu sposobnost, što uključuje amputacije (iz bilo kojeg razloga) i mutilacije u području lica,
- Teške kardiovaskularne bolesti koje dovode oštećenja srčane funkcije (Nyha III i IV),
- Teške respiratorne bolesti praćene trajnim oštećenjem respiratorne funkcije (FVC, FEV1 ispod 40%),
- Ograničenje vida preko 90% na jednom ili oba oka,
- Gubitak sluha po Fowleru 95-100% sa teškim smetnjama govora,
- Teške bolesti jetre različite etiologije sa trajno promijenjenim i patološkim nalazima u kliničkom, laboratorijskom i funkcionalnom smislu a koji zahtijevaju dugotrajno liječenje,
- Teška hronična gastrointestinalna oboljenja koja ugrožavaju život, zahtijevaju dugotrajni tretman i dugotrajno bolničko liječenje,

- Teške duševne bolesti sa više hospitalizacija i teškim oštećenjem životne, socijalne i radne funkcionalnosti,
- Teške sistemske bolesti -SLE i druge bolesti koje dovode do trajnog funkcionalnog oštećenja ili onesposobljenosti oboljelog,
- Teške bolesti koštano-mišićnog sistema protruzija diska, hernija diska, praćene komplikacijama, težim funkcionalnim oštećenjem nerava, mišica, popuštanjem sfinktera kao i bolesti koje uzrokuju ozbiljne funkcionalne smetnje lokomotornog sistema, vežu bolesnika za postelju i znatno ga ograničavaju u svakodnevnim i radnim aktivnostima,
- Transplantacijom organa i koštane srži,
- Stanja nakon operativnog zahvata na srcu, mozgu, plućima, trbušnoj šupljini, lokomotornom sistemu koja zahtijevaju duže bolničko liječenje, rehabilitaciju i intenzivni medikamentozni tretman,
- Sva zdravstvena stanja koja zahtijevaju liječenje u inostranstvu,
- Teške tjelesne povrede koje ozbiljno oštećuju zdravlje i uzrok su ozbiljnih oštećenja organa, osjetila i organskih sistema koja zahtijevaju duže hospitalno liječenje, medikamentozni tretman i rehabilitaciju (prijelom vratne kičme, prijelom lubanje, traumatske amputacije, prijelom i zgriječenja koji zahvata više dijelova tijela, teške opekotine čija površina opekotine ili duboke opekotine od 10% do 40% i sl.).
- Teške reumatske bolesti koje značajno limitiraju svakodnevne i profesionalne aktivnosti, radiološki verificirane destrukcije hrskavica i deformacija zglobova,
- Teška kožna oboljenja koja zahtijevaju bolničko liječenje i koja pored medikamentozne terapije i metoda liječenja ne dovodi do poboljšanja već umanjuje svakodnevnu i profesionalnu aktivnost (teške forme ihtioze, psorijaza sa psorijatičnim artritisom koji značajno umanjuje funkciju zahvaćenih zglobova i sl.)

Član 8.

- 1) Članovi Sindikata koji odlaze u penziju ostvaruju pravo na novčanu naknadu, u visini propisanoj odlukom Upravnog odbora Sindikata na snazi na dan predaje zahtjeva. Uz zahtjev se prilaže rješenje o prestanku radnog odnosa zbog odlaska u penziju i dokaz o neprekidnom članstvu u Sindikatu.
- 2) Rok za podnošenje zahtjeva za naknadu po ovom osnovu je 90 dana od dana donošenja rješenja o prestanku radnog odnosa zbog odlaska u penziju.

Član 9.

Sve naknade iz ovog Pravilnika su jednokratne.

Član 10.

- 1) Dužina članstva u Sindikatu nije uslov za dobijanje naknade za slučaj teške povrede/bolesti i/ili invalidnosti, s tim da se naknada ne može odobriti za slučajeve kada je dijagnoza teške povrede/bolesti i/ili invalidnosti uspostavljena prije stupanja u članstvo Sindikata;
- 2) Potrebna dužina članstva za naknadu zbog odlaska u penziju određuje Upravni odbor za svaku godinu.

Član 11.

Pravo na novčanu naknadu iz Člana 1. ostvaruju samo članovi Sindikata

Član 12.

Zahtjev za naknade iz ovog Pravilnika uz propisanu dokumentaciju se podnosi Odboru solidarnosti Sindikata doktora medicine i stomatologije Kantona Sarajevo, a Upravni odbor Sindikata daje saglasnost za isplatu.

Član 13.

Za provođenje ovog Pravilnika zadužuje se Upravni odbor Sindikata doktora medicine i stomatologije Kantona Sarajevo i Odbor solidarnosti.

Član 14.

Pravilnik stupa na snagu danom donošenja. Stupanjem na snagu ovog pravilnika prestaje s važenjem odredbe Pravilnika o načinu i postupku ostvarivanja prava na naknadu u slučaju smrti, teške povrede/bolesti i invalidnosti kao i penzionisanja člana Sindikata od 11.10.2022. godine.

Sarajevo, 19.12.2023.godine

Predsjednik UO SDMISKS
Prim. dr Izet Hočko